

Merr muss sich alles uffschreiwe

Als ich gestern dorch die Grawestrooß gefahrn bin, habb ich grad die Paula aus de Abbedek kumme seh, unn weil dort grad enn Parkplatz frei war, binn ich druffgefahrn, habs Audo garnit abgeschlosse unn bin ihr e paar Meter noochgerennt. Paula, habb ich gerufe, Paula - ei wart doch emol!

Die Paula iss steh gebliwwe, unn als ich beierre war, hottse gesacht: Ei gude Honnes. Josses naa, mir hawwe unns joo schunn seit zwaa Woche nimmi geseh. Was issen los mett eich?

Ich habb erst emol nooch Luft geschnappt: Merr iss nix mehr gewehnt, doo bin ich nor e paar Meter gerennt unn schnauf schunn wie enn Gaul. Nix iss los, awwer uns gehts wie eich - alleweil gibts was ze feiern. Du warst in de Abbedek? Iss was mettem Karl – der war schunn zwaa Sunndaache nimmi om Stommdisch gewese. Isser kronk, ei doo misst ich enn joo mol besuche.

Naa, Honnes, hott die Paula zur Antwort gewwe, ich habb ferr mich was gehollt. Awwer ess iss wirklich jeden Daach was onnerst. Alsfort sinn merr unnerweechs, ich bin froh wenn de Juli erumm iss, doo werrds e bisje ruhicher unn doo misse merr widder emol ooner drinke geh.

Ich habb genickt: Ja, dess misse merr. Awwer saach emol, kann dess soi, dass de Karl ewe e bisje vergesslich werrd?

Ja, gibt die Paula zur Antwort, dess stimmt. Awwer der hott joo die gonz Zeit nit uff mich geheert. Ich habbem gesacht, de Honnes hott immer enn Zeddel oisticke, de Schorsch dut beim Oikaafe sich Werder merke, nor du moonst dassde dess nit brauchst. Debei wenn ich dich irchendwo hieschick um was ze holle, bringsde merr nor die Hälft mett hoom. Machs wie de Honnes odder wie de Schorsch, awwer mach was.

Unn?, habb ich gesacht, mächder was?

Die Paula hott genickt: Ja – er mächt was. Weil voorsche Mittwoch isser vom Friehtick uffgestonne unn iss in de Keller, wo der soi ganze Krom uffheebt, aach Hefte unn so Zeich. Allser nooch zeh Minutte nit zurükkumme iss, bin ich emol enunner unn doo stehter doo unn kratzt sich om Kopp. Suchsde was? habb ich enn gefroocht, kann ich derr helfe? Awwer wenn derr in de Kich was oigefalle iss, wassde jetz nimmi waaßt, dann gehsde grad nochemol enuff unn dann fällders widder oi. Mir setze uns also widder on de Disch, de Karl iwwerleecht unn uff oomol springter uff, rennt in de Keller unn kimmt mett so emm ahle Daschekalenner zurick. Unn hott gebrummelt: Ich wernn merr ab jetz alles uffschreiwe, weil ich habb vorhin unne im Keller noch nit emol mehr gewusst, dass ich Babier suche wollt um merr alles uffzeschreiwe.

Gut, habb ich gesacht, dess hilft emm Karl bestimmt. Awwer mett moine odder dem Schorsch soine Methode konnter sich nit oofreunde, odder?

Die Paula hott gegrinst: Er wollt soi eiche System entwickele, um sich was ze merke. Unn er hott oogefonge sich Gras in de Säckel ze stecke, wanner Salat vom Markt mett-brenge sollt unn hott sich enn Naachel oigesteckt wanner Butter holle wollt unn so.

Koo schlecht Idee, habb ich gemoont.

Die Paula hott de Kopp geschittelt: E schlecht Idee. Die habb ich emm gleich ausgedriwwe, allser e Schraubzwing uffs Bicherregal geleeht hott, umm on unsern Hochzeitsdaach ze denke.

Eiern Honnes